

摘藻堂四庫全書薈要

史部

欽定四庫全書薈要卷六千八百五

史部

明史卷二百十二

大學士張廷玉等奉 敕修

列傳第一百

俞大猷

廬 鎰
湯克寬

戚繼光

弟 繼美
朱 先

劉 顯

郭 成

李 錫

黃應甲
尹 鳳

張元勲

俞大猷字志輔晉江人少好讀書受易於王宣林福德

蔡清之傳又聞趙本學以易推行兵家竒正虛實之權
復從受其業嘗謂兵法之數起五猶一人之身有五體
雖將百萬可使合為一人也已又從李良欽學劍家貧
屢空意嘗豁如父歿棄諸生嗣世職百戶舉嘉靖十四
年會試除千戶守禦金門軍民慕訟號難治大猷導以
禮讓訟為衰止海寇頻發上書監司論其事監司怒曰
小校安得上書杖之奪其職尚書毛伯溫征安南復上
書陳方畧請從軍伯溫竒之會兵罷不果用二十一年

諳達大入山西詔天下舉武勇士大猷詣巡按御史自薦御史上其名兵部會伯溫為尚書送之宣大總督翟鵬所召見論兵事大猷屢折鵬鵬對曰吾不當以武人待子下堂禮之驚一軍然亦不能用大猷辭歸伯溫用為汀漳守備涖武平作讀易軒與諸生為文會而日教武士擊劍連破海賊康老倭斬三百餘人擢署都指揮僉事僉書廣東都司新興恩平峒賊潭元青等屢叛總督毆陽必進以屬大猷乃令良民自為守而親率數人

徧詣賊峒曉以禍福且教之擊劍賊駭服有蘇青蛇者
力格猛虎大猷給斬之賊益驚乃詣何老猫峒令歸民
侵田而招降渠魁輩二邑以寧二十八年春朱統巡視
福建薦為備倭都指揮會安南入寇必進奏留之先是
安南都統使福海卒子宏漢幼其大臣阮敬謀立其
壻莫敬典范子儀謀立其黨莫正中互仇殺正中敗挈
百餘人來歸子儀收殘卒遁海東至是妄言宏漢死迎
正中歸立剽掠欽廉等州嶺海騷動必進檄大猷守之

馳至廉州賊攻城方急大猷以舟師未集遣數騎諭降
且聲言大兵至賊不測果解去無何舟師至設伏寇頭
嶺賊犯欽州大猷遮奪其舟追戰數百生擒子儀弟子
流斬首千二百級窮追至海東雲屯檄宏漢殺子儀函
首來獻事平嚴嵩抑其功不叙但賚銀五十兩而已是
年瓊州五指山黎那燕構感恩昌化諸黎共反必進復
檄大猷討而朝議設參將於崖州即以大猷任之乃會
廣西副將沈希儀諸軍擒斬賊五千三百有奇招降者

三千七百大猷言於必進曰黎亦人也率數年一反一

征豈上天生人意宜建誠設市用漢法雜治之必進納

其言大猷乃單騎入峒與黎定要約海南遂安三十一

年倭賊大擾浙東詔移大猷寧台諸郡參將會賊破寧

波昌國衛大猷擊却之復攻陷紹興臨山衛轉掠至松

陽知縣羅拱宸力禦賊而大猷邀諸海斬獲多竟坐失

事停俸未幾逐賊海中焚其船五十餘予俸如故越二

年賊據寧波普陀大猷率將士攻之半登賊突出殺武

舉火斌等三百人坐戴罪辦賊俄敗賊吳淞所詔除前
罪仍賚銀幣賊自健跳所入掠大猷連戰破之旋代湯
克寬為蘇松副總兵所將卒不三百人徵諸道兵未集
賊犯金山大猷戰失利時倭屯松江柘林者盈二萬總
督張經趣之戰大猷固不可及永順保靖兵稍至乃從
經大破賊於王江涇功為趙文華胡宗憲所攘不叙坐
金山失律謫充為事官柘林倭雖敗而新倭三十餘艘
突青村所與南沙小烏口浪港諸賊合犯蘇州陸涇壩

直抵婁門敗南京都督周于德兵賊復分為二北掠潞
墅南掠橫塘延蔓常熟江陰無錫之境出入太湖大猷
偕副使任環大敗賊陸涇壩焚舟三十餘又遮擊其自
三丈浦出海者沉七艘賊乃退泊三板沙頃之他倭犯
吳江大猷及環又邀破之鶯脰湖賊走嘉興三板沙賊
掠民舟將遁大猷追擊於馬蹟山禽其魁金涇許浦白
茅港賊俱出海大猷追擊於茶山焚五舟賊走保馬蹟
山三板沙將士復追及壞其三舟江陰蔡港倭亦去官

兵分擊於馬蹟馬圖寶山值颶風作賊舟多覆柘林倭亦為官兵所擊沉二十餘舟餘賊退登陸已復泛舟出海大猷及僉事董邦正分擊獲九舟而賊又遭風壞三舟餘三百人登岸走據華亭陶宅鎮屢敗趙文華等大軍夜屯周浦永定寺官兵四集進圍之而柘林失風賊九舟巢於川沙窪糾合至四十餘艘勢猶未已巡撫曹邦輔劾大猷縱賊帝怒奪其世廕責取死罪招立功自贖時周浦賊圍急乘夜東北奔為遊擊曹克新所邀斬

首百三十遂與川沙漣賊合諸軍日夜擊賊焚巢出海
大猷偕副使王崇古入洋追之及於老鶚嘴焚巨艦八
斬獲無算餘賊奔上海浦東初以倭患急特命都督劉
遠為浙江總兵官兼轄蘇松諸郡數月無所為廷臣爭
言大猷才三十五年三月遂罷遠以大猷代賊犯西庵
沈莊及清水漣大猷偕邦政擊敗之賊走陶山詔還世
廕賊自黃浦遁出海大猷追敗之其年冬以與平徐海
功加都督僉事海既平浙西倭悉靖獨寧波舟山倭負

險官兵環守不能克時是土兵狼兵悉已遣歸而川貴
所調麻寮大刺鎮溪桑植兵六千始至大猷乘大雪四
面攻之賊死戰殺土官一人諸軍益競進焚其柵賊多
死其逸出者復殪賊盡平加大猷署都督同知明年胡
宗憲方圖汪直用盧鏜言將與通市大猷力爭不可及
直誘入下吏其黨毛海峯等遂據舟山阻岑港自守大
猷攻之時小勝然苦仰攻將士先登者多死新倭又大
至朝廷趣宗憲甚急宗憲謾為大言以對廷臣競詆宗

憲并劾大猷乃奪大猷及參將戚繼光職期一月內平賊大猷等懼攻益力賊益死守三十七年七月乃自岑港移柯梅造舟成泛海去大猷等橫擊之沈其一舟餘賊遂揚帆而南流劫閩廣大猷先後殺倭四五千賊幾乎而官軍圍賊已一年宗憲亦利其去陰縱之不督諸將邀擊比為御史李瑚所劾則委罪大猷縱賊以自解帝怒逮繫詔獄再奪世廕陸炳與大猷善密以已資投嚴世蕃解其獄令立功塞上大同巡撫李文進習其才

與籌軍事乃造獨輪車拒敵馬嘗以車百輛步騎三千
大挫敵安銀堡文進上其制於朝遂置兵車營京營有
兵車自此始也文進將襲拜姓謀之大猷果大獲詔還
世廕寇掠廣武大猷拒却之先論平汪直功許除罪錄
用及是鎮算有警川湖總督黃光昇薦大猷即用為鎮
算參將廣東饒平賊張璉數攻陷城邑積年不能平四
十年七月詔移大猷南贛合閩廣兵討之時宗憲兼制
江西知璉遠出檄大猷急擊大猷謂宜以潛師搗其巢

攻其必救奈何以數萬衆從一夫浪走哉乃疾引萬五

千人登柏嵩嶺俯瞰賊巢連果還救大猷連破之斬首

千二百餘級賊懼不出用間誘璉出戰從陣後執之并

執賊魁蕭雪峯廣人攘其功大猷不與較散餘黨二萬

不戮一人擢副總兵協守南贛汀漳惠潮諸郡遂乘勝

征程鄉盜走梁寧禽徐東州林朝曦者獨約黃積山大

舉官軍攻斬積山朝曦遁後亦為徐甫宰所滅大猷尋

擢福建總兵官與戚繼光復興化城共破海倭詳繼光

傳繼光先登受上賞大猷但資銀幣是冬徒鎮南贛
明年改廣東潮州倭二萬與大盜吳平相為犄角而
諸峒藍松三伍端溫七葉丹樓輩日掠惠潮間閩則
程紹祿亂延平梁道輝擾汀州大猷以威名懾羣道單
騎入紹祿營督使歸峒因令驅道輝歸兩人卒為他將
所滅惠州叅將謝敕與伍端溫七戰失利以俞家軍至
恐之端乃驅諸酋以歸無何大猷果至七被禽端自縛
乞殺倭自効大猷使先驅官軍繼之圍倭鄒塘一日夜

克三巢焚斬四百有奇又大破之海豐倭悉奔崎沙甲
子諸澳奪漁舟入海舟多沒於風脫者二千餘人保海
豐金錫都大猷圍之兩月賊食盡欲走副將湯克寬
設伏邀之手斬其梟將三人叅將王詔等繼至賊遂大
潰乃移師潮州以次降藍松三葉丹樓遂使招降吳平
居之梅嶺平未幾復叛造戰艦數百聚衆萬餘築三賊
守之行劫濱海諸郡縣福建總兵官戚繼光襲平平遁
保南澳四十四年秋入犯福建把總朱機等戰沒於海

中大猷將水兵繼光將陸兵夾擊平南澳大破之平僅
以身免奔據饒平鳳凰山繼光留南澳大猷部將湯克
寬李超等躡賊後連戰不利平遂掠民舟出海閩廣巡
按御史文章論之大猷坐奪職平卒為克寬所追擊遠
遁以免不敢入犯矣河源翁源賊李亞元等猖獗總督
吳桂芳留大猷討之徵兵十萬分五哨進大猷使間携
賊黨而親搗其巢生禽亞元俘斬一萬四百奪還男婦
八萬餘人乃還大猷職以為廣西總兵官故事以勲臣

總兩廣兵與總督同鎮梧州帝用給事中歐陽一敬議
兩廣各置大帥罷勲臣乃召恭順侯吳繼爵還京以大
猷代予平蠻將軍印而以劉顯鎮廣東兩廣並置帥自
大猷及顯始伍端死其黨王世橋等復叛刼執同知郭
文通大猷連敗之其部下執以獻進署都督同知海賊
曾一本者吳平黨也既降復叛執澄海知縣敗官軍守
備李茂才中礮死詔大猷暫督廣東兵協討隆慶二年
一本犯廣州尋犯福建大猷合郭成李錫軍擒滅之錄

功進右都督廣西古田獐黃朝猛韋銀豹等嘉靖末嘗
再劫會城庫殺參將黎民表巡撫殷正茂徵兵十四萬
屬大猷討分七道進連破數十巢賊保潮水巢之極巔
攻十餘日未下大猷佯分兵擊馬浪賊而密令參將王
世科乘雨夜登山設伏黎明礮發賊大驚諸軍攀援上
賊盡死馬浪諸巢相繼下斬獲八千四百有奇禽朝猛
銀豹百年積寇盡除進世廕為指揮僉事大猷為將廉
馭下有恩數建大功威名震遠服而巡按李良臣劾其

奸貪兵部力持之詔還籍候調起南京右府僉書未任
以都督僉事為福建總兵官萬厯元年秋海寇突閩峽
澳坐失利奪職復以署都督僉事起後府僉書領車營
訓練三疏乞歸卒贈左都督謚武襄大猷負奇節以古
賢豪自期其用兵先計後戰不貪近功忠誠許國老而
彌篤所在有大勲武平崖州饒平皆為祠祀譚綸嘗與
書曰節制精明公不如綸信賞必罰公不如戚精悍馳
騁公不如劉然此皆小知而公則堪大受戚謂戚繼光

劉謂劉顯也子咨臯福建總兵官盧鏜汝寧衛人嘉靖時由世廕歷福建都指揮僉事為都御史朱紈所任紈自殺鏜亦論死尋赦免以故官備倭福建遷都指揮擊賊嘉興敗責戴罪尋擢參將分守浙東濱海朱郡與副將大猷大破賊王江涇旋督保靖土兵及蜀將陳正元兵擊賊張莊焚其壘追擊之後港為賊所敗賊出沒台州外海都指揮王沛敗之大陳山賊登山官軍焚其舟鏜會勦禽其酋林碧川等餘倭盡滅別賊掠諸縣指揮

閔溶等敗死鏜奪職戴罪旋以薦擢協守江浙副總兵
賊陷仙居趨台州鏜破之彭溪乃與胡宗憲共謀滅徐
海宗憲招汪直鏜亦說日本使善妙令禽直直與日本
貳卒服誅倭犯江北鏜馳援破之又敗北洋倭二十餘
艘賊斂舟三沙復流劫江北巡撫李遂劾鏜縱賊鏜已
擢都督僉事為江南浙江總兵官奪職視事以通政唐
順之薦復職如初尋以誅汪直功進都督同知倭復犯
浙東水陸十餘戰斬首千四百有奇總督宗憲以蕩平

聞鏜復增俸資金鏜擢用由宗憲宗憲敗給事中邱樞劾鏜八罪逮治免歸鏜有將畧倭難初興諸將悉望風潰敗獨鏜與湯克寬敢戰名亞俞戚云克寬邳州衛人父慶嘉靖中江防總兵官克寬承世廕歷官都指揮僉事充浙江參將倭犯温州克寬擊敗之別賊寇嘉興屬邑克寬至海鹽被圍偕參政潘恩等拒守賊不能克乃焚掠而去無何陷乍浦城轉掠奉化寧海克寬追圍於獨山民家火焚之賊半死餘奪圍遁時濱海多被倭患

而將士無紀律賊至輒奔議設大將統制江淮乃命克寬為副總兵駐金山衛提督海防諸軍倭三百人泊崇明南沙克寬偕僉事任環攻之敗績賊移舟寶山克寬追敗之南家嘴賊乃轉寇嘉定上海間被劾奪官從軍倭二千餘分掠蘇松克寬逆戰採淘港斬首八百餘級都御史王忬薦為浙西參將遇賊嘉湖復失利詔以白衣辨賊總督張經議搗賊柘桑林令克寬將廣西兵屯乍浦與副將大猷等相犄角大戰王江涇斬級二千會

趙文華劾經惑克寬言縱倭飽颺遂併逮問論死久之
赦免廣東用兵命赴軍前自効從大猷大破倭海豐還
世廕俄以為惠潮參將復從大猷破吳平平未幾復振
克寬已擢狼山副總兵命留討賊俄敗之陽江烏豬洋
平窘奔安南都御史吳桂芳檄安南協討遣克寬以舟
師會夾擊平萬橋山下焚其舟禽斬四百人平遠竄乃
進克寬署都督僉事為廣東總兵官曾一本突海豐惠
來問克寬倡議撫之令居潮陽下澮地未幾激民變一

本亦反詔逮克寬訊治尋赦免赴薊鎮立功萬厯四年
綽哈入掠古北口克寬偕參將苑宗儒追出塞遇伏戰
死

戚繼光字元敬世登州衛指揮僉事父景通厯官都指
揮署大寧都司入為神機坐營有操行繼光幼倜儻負
奇氣家貧好讀書通經史大義嘉靖中嗣職用薦擢署
都指揮僉事備倭山東改僉浙江都司充參將分部寧
紹台三郡三十六年倭犯樂清瑞安臨海繼光援不及

以道阻不罪會俞大猷兵圍汪直餘黨於岑港日久不克坐免官戴罪辦賊已而倭遁他倭復焚掠台州給事中羅嘉賓等劾繼光無功且通番方按問旋以平汪直功復官改守台金嚴三郡繼光至浙時見衛所軍不習戰而金華義烏俗稱慄悍請召募三千人教以擊刺法長短兵迭用由是繼光一軍特精又以南方多藪澤不利馳逐乃因地形制陣法審步伐便利一切戰艦火器兵械精求而更置之戚家軍名聞天下四十年倭大掠

兆渚圻頭繼光急趨寧海扼桃渚敗之龍山追至鴈門
嶺賊遁去乘虛襲台州繼光手殲其魁賊餘賊瓜陵江
盡死而圻頭倭復趨台州繼光邀擊之仙居道無脫者
先後九戰皆捷俘馘一千有奇焚溺死者無算總兵官
盧鏜叅將天錫又破賊寧波溫州浙東平繼光得進秩
三等閩廣賊流入江西總督胡宗憲檄繼光援擊敗之
上坊巢賊奔建寧繼光還浙江明年倭大舉犯福建自
溫州來者合福寧連江諸倭攻陷壽寧政和寧德自廣

東南粵來合福清長樂諸倭攻陷元鍾所并延及龍巖
松溪大田古田莆田是時寧德已屢陷距城十里有橫
嶼四面皆水路險隘賊結大營其中官軍不敢擊相守
踰年其新至者營牛田而酋長營興化東南互為聲援
閩中告急宗憲復檄繼光勦之先擊橫嶼之賊人持草
一束填壕進大破其巢斬首二千六百乘勝至福清搗
敗牛田賊覆其巢餘賊走興化急追之夜四鼓抵賊柵
連克六十營斬首千數百級平明入城興化人始知牛

酒勞不絕繼光乃旋師抵福清遇倭自東營澳登陸擊斬二百人而劉顯亦屢破賊閩宿寇幾盡於是繼光至福州飲至勒石平遠臺及繼光還浙後新倭至者日益衆圍興化城匝月會顯遣卒八人齎書城中衣刺天兵二字賊殺而衣其衣給守將得入夜斬關延賊副使翁時器叅將軍高走免通判奚世亮攝府事遇害焚掠一空留兩月破平海衛據之初興化告急時帝已命俞大猷為福建總兵官繼光副之及城陷劉顯軍少壁城下

不敢擊大猷亦不欲攻需大軍合以困之四十二年四月繼光將浙兵至於是巡撫譚綸令將中軍顯左大猷右合攻賊於平海繼光先登左右軍繼之斬級二千二百還被掠者三千人綸上功繼光首顯大猷次之帝為告謝郊廟大行叙賚繼光先以橫嶼功進署都督僉事及是進都督同知世廕千戶遂代大猷為總兵官明年二月倭餘黨復糾新倭萬餘圍仙遊三日繼光擊敗之城下又追敗之王倉坪斬首數百級餘多墜崖谷死存

者數千奔據漳浦蔡玉嶺繼光分五哨身持短兵緣崖上俘斬數百人餘賊遂掠漁舟出海去久之倭自浙犯福寧繼光督叅將李超等擊敗之乘勝追永寧賊斬馘三百有奇尋與大猷擊走吳平於南澳遂擊平餘孽之未下者繼光為將號令嚴賞罰信士無敢不用命與大猷均為名將操行不如而果毅過之大猷老將務持重繼光則颺發雷舉屢催大寇名更出大猷上隆慶初給事中吳時來以薊門多警請召大猷繼光專訓邊卒部

議獨用繼光乃召為神機營副將會譚綸督師遼薊乃
集部兵三萬徵浙兵三千請專屬繼光訓練帝可之二
年五月命以都督同知總理薊州昌平保定三鎮練兵
事總兵官以下悉受節制至鎮上疏言薊門之兵雖多
亦少其原有七營軍不習戎事而好末技壯者役將門
老弱僅充伍一也邊塞遼迤絕鮮郵置使客絡繹日事
將迎叅游為驛使營壘皆傳舍二也寇至則調遣無法
遠道赴期卒斃馬僵三也守塞之卒約束不明行伍不

整四也臨陣馬軍不用馬而反用步五也家丁盛而軍心離六也乘障卒不擇衝緩備多力七分也七害不除邊備曷修而又有士卒不練之失六雖練無益之弊四何謂不練夫邊所籍惟兵兵所籍惟將今恩威號令不足服其心分數刑名不足齊其力緩急難使一也有火器不能用二也棄土著不練三也諸鎮入衛之兵嫌非統屬漫無紀律四也班軍民兵數盈四萬人各一心五也練兵之要在先練將今注意武科多方保舉似矣但

此選將之事非練將之道六也何謂雖練無益今一營之卒為礮手者常十也不知兵法五兵迭用當長以衛短短以救長一也三軍之士各專其藝金鼓旗幟何所不蓄今皆置不用二也弓矢之力不强於寇而欲藉以制勝三也教練之法自有正門美觀則不實用實用則不美觀而今悉無其實四也臣又聞兵形象水水因地而制流兵因地而制勝薊之地有三平原廣陌內地百里以南之形也半險半易近邊之形也山谷仄隘林薄

翦翳邊外之形也寇入平原利車戰在近邊利馬戰任
邊外利步戰三者迭用乃可制勝今邊兵惟習馬耳未
嫻山戰林戰谷戰之道也惟浙兵能之願更予臣浙東
殺手礮手各三千再募西北壯士足馬軍五枝步軍十
枝專聽臣訓練軍中所需隨宜取給臣不勝至願又言
臣官為創設諸將視為綴疣臣安從展布章下兵部言
薊鎮既有總兵又設總理事權分諸將多觀望宜召還
總兵郭琥專任繼光乃命繼光為總兵官鎮守薊州永

平山海諸處而浙兵止弗調錄破吳平功進右都督寇
入青山口拒却之自嘉靖以來邊牆雖修墩臺未建繼
光巡行塞上議建敵臺畧言薊鎮邊垣延袤二千里一
瑕則百堅皆瑕比來歲修歲圯徒費無益請跨牆為臺
睥睨四達臺高五丈虛中為三層臺宿百人鎗仗糗糧
具備令戍卒畫地受工先建千二百座然邊卒木彊律
以軍法將不堪請募浙人為一軍用倡勇敢督上上其
議許之浙兵三千至陳郊外天大雨自朝至日昃植立

不動邊軍大駭自是始知軍令五年秋臺功成精堅雄壯二千里聲勢聯接詔予世襲賚銀幣繼光乃議立車營車一輛用四人推輓戰則給方陣而馬步軍處其中又製拒馬器體輕便利過寇騎衝突寇至火器先發稍近則步軍持拒馬器排列而前間以長鎗篋筦寇奔則騎軍逐北又置輜重營隨其後而以南兵為選鋒入衛兵主策應本鎮兵專戍守節制精明器械犀利薊門軍容遂為諸邊冠是時諳達已通貢宣大以西西烽火寂

然獨小王子後土默特徙居察罕地控弦十餘萬常為
薊患而朵顏董狐狸及其兄子長安交通土默特時叛
時服萬厯元年春二寇謀入犯馳喜峯口索賞不得則
肆殺掠獵傍塞以誘官軍繼光掩擊幾獲呼哩其夏復
犯桃林不得志去長安亦犯界嶺官軍斬獲多邊吏諷
之降呼哩乃款關請貢廷議給以歲賞明年春長安復
規諸口不得入則與呼哩共逼察克圖令入寇繼光擒
之以歸察克圖者呼哩之弟長安叔父也於是二寇率

部長親族三百人叩關請死罪呼哩服素衣叩頭乞赦

察克圖繼光及總督應節等議遣副將史宸羅端詣喜

峯口受降皆羅拜獻還所掠邊人攢刀設誓乃釋察克

圖許通貢如故終繼光在鎮二寇不敢薊門以守邊勞

進左都督已增建敵臺分所部十二區為三協協置副

將一分練士馬綽哈入犯湯克寬戰死繼光被劾不罪

久之綽哈偕妻德特必濟襲掠邊卒官軍追破之土默

特犯遼東繼光急赴偕遼東軍拒退之繼光已加太子

太保錄功加少保自順義受封朝廷以八事課邊臣日
積錢穀修險隘練兵馬整器械開屯田理鹽法收塞馬
散叛黨三歲則遣大臣閱視而殿最之繼光用是頻廢
賚南北名將馬芳俞大猷前卒獨繼光與遼東李成梁
在然薊門守甚固敵無由入盡轉而之遼故成梁擅戰
功自嘉靖庚戌諳達犯京師邊防獨重薊增兵益餉騷
動天下復置昌平鎮設大將與薊相脣齒猶時躡內地
總督王忬楊選並坐失律誅十七年間易大將十人率

罪去繼光在鎮十六年邊備修飭薊門宴然繼之者踵其成法數十年得無事亦賴當國大臣徐階高撫張居正先後倚任之居正九事與商推欲為繼光難者輒從之去諸督撫大臣如譚綸劉應節梁夢龍輩咸與善動無掣肘故繼光益發舒居正歿半歲給事中張鼎思言繼光不宜於北當國者遽改之廣東繼光悒悒不得志強一赴踰年即謝病給事中張希臯等復劾之竟罷歸居三年御史傳光宅疏薦反奪俸繼光亦遂卒繼光更

歷南北並著聲在南方戰功特盛北則專主守所著紀
效新書練兵事實談兵者遵用焉弟繼美亦為貴州總
兵官有朱先者嘉興人當繼光時為薊鎮南兵營叅將
遷副總兵後數為廣東福建總兵官初起家武舉募海
濱鹽徒為一軍自胡宗憲為御史至總督皆倚任先大
小數十戰皆先登殺倭甚衆以功授都司胡宗憲逮先
解官護行宗憲釋還先乃歸御史按福建巡撫王詢侵
軍費檄先証之先曰先王公部將也不敢証府主御史

怒坐先萬金論死繫獄閱八年始白萬歷初用薦起園
山把總歷閩登帥以年老謝事歸復起辭不赴先為將
有胆智砥節首公其處宗憲詢二事時論以為有國士
風

劉顯南昌人生而膂力絕倫稍通文義家貧落魄之叢
祠欲自經神護之不死間行入蜀為童子師已冒籍為
武生嘉靖三十四年宜賓苗亂巡撫張臬討之顯從軍
陷陣手格殺五十餘人禽首惡三人諸軍繼進賊盡平

顯由是知名官副千戶輸貲為指揮僉事南京振武營
初設用兵部尚書張鰲薦召令訓練擢署都指揮僉事
僉書浙江都司遷叅將分守蘇松倭犯江北逼泗州鰲
檄顯防浦口顯測賊將遁追擊至安東方暑彼單衣率
四騎誘賊伏精甲岡下賊出斬一人所乘馬中矢下拔
其鏃射殺追者誘至岡下大敗之去賊出所俘女子盡
將士顯悉送有司明日伺賊出潛燬其舟賊敗走舟舟
已焚死者無算顯進秩三等尋遷副總兵協守江浙三

沙倭復劫江北被圍於劉家莊顯以銳卒數千至巡撫
李遂令盡護江北軍顯率所部直入諸營繼之自辰迄
酉賊巢破遂北至白駒場茅花墩斬首六百有奇賊盡
殄而遂謂賊由三沙來實盧鏜及顯罪顯坐停俸已應
天巡撫翁大立薦顯驍勇請久任帝可之振武營兵變
後諸將務姑息兵益驕給事魏元吉薦顯署都督僉
事節制其軍顯挈蜀卒五百人往一軍帖然閩賊流入
江西大掠石城臨川東鄉金谿殺吏民萬計詔顯赴勦

擊敗之陽湖賊乃遁四十一年五月廣東賊大起詔顯
充總兵官鎮守會福建倭患棘顯赴援與叅將戚繼光
連破賊賊畧盡而新倭大至攻臨興化城顯以兵少逼
城未敢戰被劾戴罪賊以間攻據平海衛他倭劫福清
謀與平海倭合顯及俞大猷合於遮浪盡殲之平海倭
欲遁為紀總許朝光所邀敗乃盡焚其舟退還舊屯戚
繼光亦至顯與大猷共助擊之遂復興化錄功進先所
廕世職二秩江北倭未平廷議設總兵官於狼山統制

大江南北改顯任之顯行部通州以敕書許節制知府
以下而同知王汝言不為禮劾奏鐫其秩已移鎮浙江
顯有將畧居官不守法度巡按御史劾之革任候勘用
巡撫劉畿薦命充為事官鎮守如故隆慶改元以軍政
拾遺被劾貶秩視事用巡撫谷中虛薦還故官移鎮貴
州廣西猥賊者念父子僭稱王攻剽安順巡撫阮文中
檄顯勦俘斬五百餘人四川巡撫曾省吾議征都掌蠻
令顯移鎮其地復被劾罷省吾奏留之都掌蠻者居叙

州戎縣介高珙鈞連長寧江安納溪六縣間古瀘賊也
成化初為亂程信討平之正德中普法惡復為亂馬昊
討平之至是其首阿大阿二方三等據九絲山剽遠近
其山修廣而四隅峭仄東北則鷄冠嶺都都寨凌霄峯
三岡峻壁數千仞有阿苟者居凌霄峯為賊耳目威儀
出入如王者省吾議討之屬顯軍事起故將郭成安大
朝為佐調諸土兵合官軍凡十四萬人萬厯改元三月
畢集叙州誘執阿苟攻拔凌霄進逼都都寨三酋遣其

黨阿墨固守官軍頓匝月鑿灘以通漕擊斬阿墨拔其寨阿大自守鷄冠顯令人誘以官而分五哨盡壁九絲城下乘無備夜半腰絙上斬闕入遲明諸將畢至阿二方三走保牡豬寨郭成破鷄冠獲阿大諸軍攻牡豬禽方三阿二走追獲於貴州大盤山克寨六十餘獲賊魁三十六俘斬四千六百拓地四百餘里得諸葛銅鼓九十三銅鐵鍋各一阿大泣曰鼓聲宏者為上可易千年次者七八百得鼓二三便可僭號稱王鼓山頭羣蠻畢

集今已矣。鍋狀如鼎，大可亟牛，刻畫有文彩，相傳諸葛亮以鼓鎮蠻，鼓失則蠻運終矣。錄功進顯都督同知，已而勦餘孽，復俘斬千一百有奇。都掌蠻既滅，顯引疾求去，而以有司阻撓為言，詔聽顯節制，顯並行其志。擊西川番沒古丟骨人荒諸砦，斬其首惡，撫餘衆而還。建昌傀儡洗馬番咸獻首惡，西陲以寧。九年冬卒。官子緹自有傳。郭成，四川叙南衛人，由世職歷官。蘇松叅將進副總兵，倭犯通州，為守將。李錫所敗，轉掠崇明、三沙、成。

擊沈其舟斬首百三十餘級隆慶元年冬擢署都督僉
事為廣東總兵官渡海追曾一本大獲進署都督同知
叛將周雲翔等殺叅將耿宗元亡入賊中屯平山大安
峒將寇海豐成偕南贛軍夾擊之斬首千三百餘級獲
被掠通判潘槐而下六百餘人生繫雲翔潮州諸屬邑
賊巢以百數郭明據林樟胡一化據北山洋陳一義據
馬湖剽劫二十載成督諸軍擊殺明等俘斬千三百有
奇四川都掌蠻為亂詔成督諸軍擊殺罷歸萬厯改元

命劉顯大征詔成充為事官為之副先登九絲山生繫
阿大初成父為蠻殺乃以所斬首級及生禽諸蠻置父
墓前剖心置祭鄉人壯之尋僉書南京後府出為貴州
總兵官鎮守銅仁成有膽智每苗出掠潛遣壯士入其
砦斬馘而出嘗挺身入林箐察賊苗一日數驚曰郭將
軍至矣相戒莫敢犯復被劾罷歸起四川總兵官永寧
宣撫奢效忠卒其妻奢世統無子妾奢世續子崇周幼
前總兵官顯因命世續署宣撫印世統怒攻奪其落紅

寨世續奔永寧成遣義兒郭天心偕指揮禹嘉續按問
天心遂據世續永寧私第罄取其資而成亦入落紅盡
掠奢氏九世之積效忠弟沙卜遂拒殺裨將三人執天
心等撫按交章劾成下吏遣戍雲南會有松茂之役薦
從軍成乃將千人直抵黃沙屢破賊與總兵官李應
祥盡平河東西諸巢以功授叅將復偕應祥大破賊乃
諸賊增世職二級賊乃黨楊九乍復出為亂成討平之
霍落齊擾西寧四川巡撫李尚思以地近松潘檄成軍

松林游擊萬鏊軍漳臘寇不敢逼西陲獲安楊應龍叛
成進討無功戴罪辦理尋卒於官

李錫欽人世新安衛千戶倭警數有功為通州守備屢
擢揚州叅將江北副總兵隆慶元年冬以署都督僉事
為福建總兵官海寇曾一本橫行閩廣間俞大猷將赴
廣西總督劉燾令會閩師夾擊一本至閩錫出海禦之
與大猷遇賊柘林澳三戰皆捷賊遁馬耳澳復戰會廣
東總兵官郭成率叅將王詔等以師會次萊蕪澳分三

哨進一本駕大舟力戰諸將連破之燬其舟詔生禽一本及其妻斬首七百餘死水火者萬計時廣寇惟一本最强錫大猷成共平之而錫功最鉅其後一本餘黨梁本豪復亂為黃應甲所禽然視錫時力較易錫論功加署都督同知倭入寇擊却之六年春以征蠻將軍代大猷鎮廣西平樂府江者桂林抵梧州驛道也南北亘五百里兩岸崇山深箐賊巢盤互自嘉靖間張岳破平之後至是復猖獗嘗執知州邀重賄道路梗塞城門晝閉大

猷議討之會罷官去巡撫郭應聘與錫計徵兵六萬令
叅將錢鳳翔王世科都指揮王承恩董龍各將一軍以
副使鄭茂金柱僉事夏道南監之錫居中節制破賊巢
數十斬馘五千有奇獍首楊錢甫等悉授首錄功進世
職二等柳州懷遠猺獠狔獠環居之猺尤獷悍侵據縣
治久吏民率寓郡城隆慶時大征古田諸猺懼而聽命
知縣馬希武之官繕城塹程役過嚴諸猺殺希武及經
厯等五人復反巡撫應聘與總督殷正茂議征之萬厯

元年正月錫進次長安鎮會連雨雪乃退師益徵浙東
烏銃手湖廣永順鉤刀手及狼兵十萬人令叅將鳳翔
世科都指揮楊照戚繼光故叅將亦孔昭魯國賢六道
並進監以副使沈子木錫自統水師次羅江獨當其衝
時賊屯板江大洲累石樹柵潛以舟來襲錫伏舟敗之
水陸並進會鳳翔等亦至賊悉舟西遁追擊連破數巢
賊據楓木大山前阻隄澗鼓譟出諸軍奮擊而別以奇
兵撓其後賊大奔保天鵝嶺錫以水軍截潯江督諸將

攻斬渠魁二人乘勝復破數破巢直抵清州界賊大巢
亘數里崖壁峭絕為重柵拒官軍鏢帑矢石雨下婦人
裸體揚箕擲牛羊犬首為厭勝諸軍大呼直上四面舉
火賊盡殲先後破巢一百四十獻馘三千五百有奇俘
獲撫降者無算永福永寧柳城并以賊告洛容撞又殺
典史錫令王端討永寧柳照討柳城叅將門崇文討永
福亦孔昭討洛容已師舟師屯理定江節制諸軍甫二
旬四道並捷斬首四千五百有奇洛容賊首陶浪金等

俱伏誅錫以功進秩二等巡按御史唐諫言錫一年內

破賊二百一十四巢獲首功一萬二千餘級宜久其任

帝可之尋從凌雲翼大破羅旁賊授世廕百戶六年卒

官黃應甲者不知何許人隆慶中以潯梧左叅將從俞

大猷討平韋銀豹進秩二等萬曆五年屢遷浙江總兵

官改鎮廣東龍川鮑時秀者妻杜氏有妖術乃據義都

緱嶺立二十四方大總自號無敵峒王既降復反應甲

討平之蜚戶蘇觀陞周才雄招亡命數千人縱掠雷廉

間殺斷州千戶田治應甲率五軍並進生禽觀陞才雄
斬首四百餘級其黨縛酋長陳泉以降未幾梁本豪亂

本豪故曾一本黨亦蚤戶也一本誅竄海中習水戰遠
通西洋且結倭兵為助殺千戶掠通判以去十年六月
總督陳瑞與應甲謀分水軍二南駐老萬山備倭東駐
虎門備蚤別以兩軍備外海兩軍扼要害水軍沈蚤舟
二十生禽本豪諸軍競進大破之石茅洲賊復奔潭洲
沙灣叙舟二百及倭舟十相犄角諸將合追先後俘斬

千六百有奇沈其舟二百餘撫降者二千五百帝為告
郊廟大行叙賚應甲等進秩有差他倭寇瓊崖應甲斬
首二百餘奪其舟再賜金旋入僉左軍府罷歸卒尹鳳
字德輝南京人錫總兵福建時步將也世府軍後衛指
揮同知鳳早孤讀書嫺騎射嘉靖中舉武科鄉會試皆
第一擢署都指揮僉事備倭福建徙僉浙江都司進福
建叅將倭陷福清南安連鯨出海鳳邀擊沈其七舟追
至外洋連戰澣嶼東洛七礁禽斬二百人擊倭梅花洋

走之追至橫山禽斬二百六十大小凡十數戰內地賴以稍寧改掌浙江都司謝病歸隆慶初以故官蒞福建從錫平曾一本萬厯初累官署都督僉事提督京城巡捕未幾謝事歸

張元勲字世臣浙江太平人嗣世職為海門衛新河所百戶沈毅有謀值倭警隸戚繼光麾下有功進千戶從礮橫嶼諸賊屢進署都指揮僉事充福建游擊將軍隆慶初破倭寇改南路叅將從李錫破曾一本進副總

兵五年春擢署都督僉事代郭成為總兵官鎮守廣東
惠州河源賊唐亞六廣州從化賊萬尚欽韶州英德賊
張廷光劫掠郡縣莫能制明年元勲進勦斬馘六百有
奇亞六等授首餘黨悉平肇慶恩平十三村賊陳金鶯
等與鄰邑苔村三巢賊羅紹清林翠蘭譚權伯藤峒九
逕十寨賊黃飛鶯邱勝富黃高暉諸可行黃朝富等相
煽為亂故事兩粵惟大征得叙功勦不叙故諸將不
樂勦勦總督殷正茂與元勲計令勦得論功諸軍爭

奮正茂又密遣副將梁守愚游擊王端等屯恩平若常
戍者掩不備斬翠蘭等生禽詔清權伯以獻其諸路鵬
勦者効首功二千四百有奇還被掠子女千三百餘人
生得金鶯惟高暉等亡去元勲逐北至藤峒又生獲勝
富可行朝富等八十人部將鄧子龍等亦獲高暉飛鶯
三巢十寨十三村諸賊盡平餘悉就撫惠潮地相接山
險木深賊首藍一清賴元爵與其黨馬祖昌黃民太曾
廷鳳黃鳴時曾萬嶂李仲山卓子望葉景清曾仕龍等

各據險結砦連地八百餘里黨數萬人正茂議大征會
金鶯等已滅諸賊頗懼廷鳳萬璋並遣子入學祖昌景
清亦佯乞降正茂知其詐徵兵四萬令叅將李誠立沈
思學王詔游擊王瑞等分將之元勲居中節制監司陳
奎唐九德顧養謙吳一介監其軍數道並進賊敗乃憑
險自守官軍遍搜深箐邃谷間而元勲偕九德追亡至
南嶺一日夜馳至養謙所擊破李坑生得子望等明年
破烏禽嶂仕龍阻高山元勲佯飲酒高會忽進兵擊禽

之先後獲大賊首六十一人次賊首六百餘人破大小巢七百餘所禽斬一萬二千有奇帝為宣捷告郊廟進元勲署都督同知世廕百戶元勲復討斬賊餘黨三千有奇撫定降者巨寇皆靖潮州賊林道乾之黨諸良寶既撫復叛襲殺官軍掠六百人入海再犯陽江敗走乃據潮故巢居高山巔不出戰官軍營於泥中副將李誠立挑戰墜馬傷足死者二百人賊出掠而敗走巢固守元勲積草土與賊壘平用火攻之斬首千一百餘級時

萬曆二年三月也捷聞進世廕一級遺尊魏朝義等四
巢亦降尋與胡宗仁共平良寶黨林鳳惠潮遂無賊其
冬倭陷銅鼓石雙魚城元勲大破之儒峒俘斬八百餘
級進秩為真五年從總督凌雲翼大征羅旁賊斬首萬
六千餘級進都督改廕錦衣尋以疾致仕卒於家元勲
起小校大小百十戰威名震嶺南與廣西李錫並稱良
將

贊曰世宗朝老成宿將以俞大猷為稱首而數奇屢躋

以內外諸臣攘攷而掩遏其功者衆也戚繼光用兵威
名震寰宇然當張居正譚綸任國事則成厥後張鼎思
張希臯等居言路則廢任將之道亦可知矣劉顯平蠻
引疾而以有司阻撓為亂有以夫李錫張元勲首功甚
盛而不蒙殊賞武功所由不競也

明史卷二百十二

欽定四庫全書

明史卷二百十二考證

俞大猷傳平安南范子儀之變

臣

章宗瀛按趙恒志

撰俞大猷行狀當大猷出廬時廬守饒大猷舉酒曰
如將軍策可幾時班師大猷曰吾行四十日當會已
與言等傳中未及謹附考

俞大猷傳從總督張經破賊于王江涇

臣

章宗瀛按

嘉靖三十五年五月張經敗倭于王江涇時趙文華

與巡按御史胡宗憲相比趣經進兵經以狼兵初集
永保保靖兵未至欲待其至而後戰文華等劾經養
寇失機疏方上而兵至經遂大破倭于王江涇為軍
興戰功第一文華等冒其功明帝以前疏逮經下獄
冬十月殺之見今獻備遺謹附考

俞大猷傳四十二年與戚繼光復興化城共破海倭是
冬徙鎮南韻按是時倭既犯淮揚吳越皆不利遂巢
閩中破城十餘官吏軍民不可勝紀特大猷猷為總

兵威繼光為副繫之閩患少熄詳明實錄謹附考

臣章宗瀛按戚繼光傳與大猷破倭在四十二年四月蓋至十月而大猷移鎮南贛傳以四十二年屬之移鎮紀叙未明擬移于擢福建總兵官下而改十月作是冬于字數亦合謹識

俞大猷傳負奇等以古賢豪自期

臣章宗瀛按趙恒

志大猷行狀言大猷入蒲時駐兵平海興泉二郡供給不至海運亦絕大猷令毀屋為營采麥而食衆心

乃定所著書有正氣堂集及欽經射法戰車續武經
總要百餘卷傳中未及謹附考

戚繼光傳父景通有操行

臣章宗瀛按識大錄劉瑾

有逆謀知景通豪傑遺之席帽景通佯應之繼乃黃
冠遁去謹附考

戚繼光傳嘉靖四十年倭大掠桃渚圻頭

臣章宗瀛

按圻頭倭起繼光率精銳一千五百人計二旬有九
日九接戰斬首一千獲兵仗三千七百有奇時號戚

家新兵所至破竹詳見識大錄謹附考

戚繼光傳弟繼美亦為貴州總兵官

臣章宗瀛按繼

光有妻無子性悍諸姬得子養之外舍然繼光嘗出鎮擊賊賊乘虛來襲妻部勒登陴城竟得完見識大錄識附考

劉顯傳伺賊出潛燬其舟

臣章宗瀛按信黃水淮上

戰功序顯選人持火器焚賊船又援檣誓衆執一幟以號于衆有能殺賊樹功者立幟下得三百人為後

勁又命甲四十人巡守六十人分伏又命三巨艦燔賊賊大潰傳中未詳載謹附識

劉顯傳萬厯九年冬卒官

臣章宗瀛按識大錄云顯

身不滿七尺不胄不介著一白衣單衣如小丈夫及遇敵提刀騰蹻超踊見刀不見身軍中稱神人謹附考

李錫傳從俞大猷討平韋銀豹

臣章宗瀛按韋銀豹

廣西桂林府古田縣獐也獐種甚繁曰韋曰閉曰白

後皆併于韋景泰間朝威據古田屢撫輒叛至銀豹
與其伯朝猛攻陷洛容還據古田分其地詳見朱國
楨記謹附考



明史卷二百十二考證



總校官編修臣吳紹濬

欽定四庫全書薈要

史部
明史卷二百十三
四



詳校官主事臣陳本

欽定四庫全書薈要卷六千八百六

史部

明史卷二百十三

大學士張廷玉等奉 敕修

列傳第一百一

徐階

弟

陟

子璠等

高

拱

郭

朴

張居正

曾孫同敞

徐階字子升松江華亭人生甫周歲墮臂井出三日而蘇五歲從父道括蒼墮高嶺衣掛於樹不死人咸異之

嘉靖二年進士第三人授翰林院編修予歸娶丁父憂服除補故官階為人短小白皙善容止性穎敏有權略而陰重不泄讀書為古文辭從王守仁門人遊有聲士大夫間帝用張孚敬議欲去孔子王號易像為木主邁豆禮樂皆有所損抑下儒臣議階獨持不可孚敬召階盛氣詰之階抗辯不屈孚敬怒曰若叛我階正色曰叛生於附階未嘗附公何得言叛長揖出斥為延平府推官連攝郡事出繫囚三百毀淫祠剏鄉社學捕劇盜百

二十人遷黃州府同知擢浙江按察僉事進江西按察副使俱視學政皇太子出閣召拜司經局洗馬兼翰林院侍講丁母憂歸服除擢國子祭酒遷禮部右侍郎尋改吏部故事吏部率鐫門所接見庶官不數語階折節下之見必深坐咨邊腹要害吏治民瘼皆自喜得階意願為用尚書熊浹唐龍周用皆重階階數署部事所引用宋景張岳王道歐陽德范鏊皆長者用卒聞淵代自處前輩取立斷階意不樂求出避之命兼翰林院學士

教習庶吉士尋掌院事進禮部尚書帝察階勤又所撰

青詞獨稱旨召直無逸殿與大學士張治李本俱賜飛

魚服及上方珍饌上尊無虛日廷推吏部尚書不聽不

欲階去左右也階遂請立皇太子不報復連請之皆不

報後當冠婚復請先裕王後景王帝不懌尋以推恩加

太子太保諳達犯京階請釋周尚文及戴綸歐陽安等

自效報可已請帝還大內召羣臣計兵事從之中官陷

寇歸以諳達求貢書進帝以示嚴嵩及階召對便殿嵩

曰饑賊耳不足患階曰傳城而軍殺人若刈菅何謂饑賊帝然之問求貢書安在嵩出諸袖曰禮部事也帝復問階階曰寇深矣不許恐激之怒許則彼厚要我請遣譯者紿緩之我得益為備援兵集寇且走帝稱善者再嵩階因請帝出視朝寇尋飽去乃下階疏弗許貢嵩怙寵弄權猜害同列既仇夏言置之死而言嘗薦階嵩以是忌之初孝烈皇后崩帝欲祔之廟念壓於先孝潔皇后又睿宗入廟非公議恐後世議祧遂欲當已世預祧

仁宗以孝烈先祔廟自為一世下禮部議階抗言女后

無先入廟者請祀之奉先殿禮科都給事中楊思忠亦
以為然疏上帝大怒階惶恐謝罪不能守前議帝又使
階往邯鄲落成呂仙祠階不欲行乃以議祔廟解得緩
期至寇逼城帝益憊乃使尚書顧可學行而內銜階摘
思忠元旦賀表誤廷杖之百斤為民以怵階嵩因謂階
可間也中傷之百方一日獨召對語及階嵩徐曰階所
乏非才但多二心耳蓋以其嘗請立太子也階危甚度

未可與爭乃謹事嵩而益精治齋詞迎帝意左右亦多
為地者帝怒漸解未幾加少保尋進兼文淵閣大學士
參預機務密疏發咸寧侯仇鸞罪狀嵩以階與鸞嘗同
直欲因鸞以傾階及聞鸞罪發自階乃愕然止而忌階
益甚帝既誅鸞益重階數與謀邊事時議減鸞所益衛
卒階言不可減又京營積弱之故卒不在乏而在冗宜
精汰之取其廩以資賞費又請罷提督侍郎孫禴帝始
格於嵩久而皆用之一品滿三載進勲為柱國再進兼

太子太傅武英殿大學士滿六載兼食大學士俸再錄
子為中書舍人加少傅九載改兼吏部尚書賜宴禮部
璽書褒諭有加帝雖重階稍示形迹嘗以五色芝授嵩
使鍊藥謂階政本所關不以相及階皇恐請乃得之帝
亦漸委任階亞於嵩楊繼盛論嵩罪以二王為徵下錦
衣獄嵩屬陸炳究主使者階戒炳曰即不慎一及皇子
如宗社何又為危語動嵩曰上惟二子必不忍以謝公
所罪左右耳公奈何顯結宮邸怨也嵩懷懼乃寢倭躡

東南帝數以問階階力主發兵階又念邊卒苦饑請收
畿內麥數十萬石自居庸輸宣府此荆輸大同帝悅密
傳諭行之楊繼盛之劾嵩也嵩固疑階趙景王宗茂劾
嵩階又議薄其罰及是給事中吳時來主事董傳策張
翀劾嵩不勝皆下獄傳策階里人時來翀階門生也嵩
遂疏辨顯謂階主使帝不聽有所密詢皆舍嵩而之階
尋加太子太師帝所居永壽宮災徙居玉熙殿隘甚欲
有所營建以問嵩嵩請還大內帝不懌問階階請以三

殿所餘材責尚書雷禮營之可計月而就帝悅如階議
命階子尚寶丞璠兼工部主事董其役十旬而功成帝
即日徙居之命曰萬壽宮以階忠進少師兼支尚書俸
予一子中書舍人子璠亦超擢太常少卿嵩乃日屈嵩
子世蕃貪橫淫縱狀亦漸聞階乃令御史鄒應龍劾之
帝勒嵩致仕擢應龍通政司參議階遂代嵩為首輔已
而帝念嵩供奉勞憐之又以嵩去忽忽不樂乃降諭欲
退而修真且傳嗣復責階等奈何以官與邪物謂應龍

也階言退而傳嗣臣等不敢奉命應龍之轉乃二部奉

旨行之帝乃已帝以嵩在直久而世蕃顧為奸於外因
命階無久直階窺帝意言苟為奸在外猶在內固請入
直帝以嵩直廬賜階階榜三語其中曰以威福還主上
以政務還諸司以用舍刑賞還公論於是朝士侃侃得
行其意袁煒數出直階請召與共擬旨因言事同衆則
公公則百美基專則私私則百弊生帝頷之階以張孚
敬及嵩導帝猜刻力反之務以寬大開帝意帝惡給事

御史抨擊過當欲有所行遣階委曲調劑得輕論會問
階知人之難階對曰大奸似忠大詐似信惟廣聽納則
窮兇極惡人為我撻之深情隱慝人為我發之故聖帝
明王有言必察即不實小者置之大則薄責而容之以
鼓來者帝稱善言路益發舒寇由牆子嶺入直趨通州
帝方祠釐兵部尚書楊博不敢奏謀之階檄宣府總兵
官馬芳宣大總督江東入援芳兵先至階請亟賞之又
請重東權俾統諸道兵寇從通掠香河階請亟備順義

而以奇兵邀之古北口寇趨順義不得入乃走古北口
其後軍遇參將郭琥伏而敗頗得其所掠人畜輜重始
帝怒博不早聞與總督楊選之任寇入也欲罪之未發
階言博雖以祠釐禁不敢聞而二鎮兵皆其所先檄若
選則非尾寇乃送之出境耳帝竟誅選不罪博進階建
極殿大學士袁煒以疾歸道卒階獨當國屢請增閤臣
且乞骸骨乃命嚴訥李春芳入閤而待階益隆以一品
十五載考恩禮特厚復賜玉帶繡蟒珍藥帝手書問階

疾諄懇如家人階益恭謹帝或有所委通夕不假寐應
制之文未嘗踰頃刻期帝日益愛階階採輿論利便者
白而行之喜靖中葉南北用兵邊鎮大臣小不當帝指
輒逮下獄誅竄閣臣復竊顏色為威福階當國後緹騎
省減詔獄漸虛任事者亦得以功名終於是論者翕然
推階為名相嚴訥請告歸命郭朴高拱入閣與春芳同
輔政事仍決於階階數請立太子不報已而景王之藩
病薨階奏奪景府所占陂田數萬頃還之民楚人大悅

帝欲建霄壇及興都宮殿階力止之鄔懋卿驟增鹽課四十萬金階風御史請復故額方士胡大順等勸帝餌金丹階力陳其矯誣狀大順等尋伏法帝服餌病躁戶部主事海瑞極陳帝失帝恚甚欲即殺之階力救得繫帝病甚忽欲幸興都階力爭乃止未幾帝崩階草遺詔凡齋醮土木珠寶織作悉罷大禮大獄言事得罪諸臣悉牽復之詔下朝野號慟感激比之楊廷和所擬登極詔書為世宗始終盛事云同列高拱郭朴以階不與共

謀不樂朴曰徐公謗先帝可斬也拱初侍穆宗裕邸階引之輔政然階獨柄國拱心不平世宗不豫時給事中胡應嘉嘗劾拱拱疑階嫉之隆慶元年應嘉以救考察被黜者削籍去言者謂拱修舊卻脅階斥應嘉階復請薄應嘉罰言者又劾拱拱欲階擬杖階從容譬解拱益不悅令御史齊康劾階言其二子多干請及家人橫里中狀階疏辯乞休九卿以下交章劾拱譽階拱遂引疾歸康竟斥朴亦以言者攻之乞身去給事御史多起廢

籍恃階而強言多過激帝不能堪諭階等處之同列欲
擬譴階曰上欲譴我曹當力爭乃可導之譴乎請傳諭
令省改帝亦勿之罪是年詔翰林撰中秋宴致語階言
先帝未撤几筵不可宴樂帝為罷宴帝命中官分督團
營階力陳不可而止南京振武營兵屢譁階欲汰之慮
其據孝陵不可攻也先令操江都御史唐繼祿督江防
兵駐陵傍而徐下兵中分散之事遂定羣小璫毆御史
於午門都御史王廷將糾之階曰不得主名劾何益且

慮彼先誣我乃使人以好語誘大璫先錄其主名廷疏
上乃分別逮治有差階之持正應變多此類也階所持
諍多宮禁事行者十八九中官多側目會帝幸南海子
階諫不從方乞休而給事中張齊以私怨劾階階因請
歸帝意亦漸移許之賜馳驛以春芳請給夫廩置書褒
美行人導行如故事陞辭賜白金寶鈔彩幣襲衣舉朝
皆疏留報聞而已王廷後刺得張齊納賄事劾奪其職
階既行春芳為首輔未幾亦歸拱再出抗階不遺餘力

郡邑有司希拱指爭齟齬階盡奪其田戍其二子會拱復為居正所傾而罷事乃解萬厯元年階年八十詔遣行人存問賜璽書金幣明年卒贈太師諡文貞階立朝有相度保全善類嘉隆之政多所匡救間有委蛇亦不失大節階弟陟嘉靖二十六年進士累官南京刑部侍郎子璠以廕官太常卿琨瑛尚寶卿孫元春進士亦官太常卿元春孫本高官錦衣千戶天啟中拒魏忠賢建祠奪職崇禎初以薦起累官左都督諸生念祖國變城

破與妻張妾陸李皆自縊

高拱字肅卿新鄭人嘉靖二十年進士選庶吉士踰年授編修穆宗居裕邸出閣講讀拱與檢討陳以勤竝為侍講世宗諱言立太子而景王未之國中外交疑拱侍裕邸九年啟王益敦孝謹敷陳剴切王甚重之手書懷賢忠貞字賜焉累遷侍講學士嚴嵩徐階遞當國以拱他日當得重薦之世宗拜太常卿掌國子監祭酒事四十一年擢禮部左侍郎尋改吏部兼學士掌詹事府事

進禮部尚書召入直廬撰齋詞賜飛魚服四十五年拜

文淵閣大學士與郭朴同入閣拱與朴皆階所薦也世

宗居西苑閣臣直廬在苑中拱未有子移家近直廬時

竊出一日帝不豫誤傳非常拱遽移具出始階甚親拱

引入直拱驟貴負氣頗忤階給事中胡應嘉階鄉人也

以劾拱姻親自危且躋階方與拱卻遂劾拱不守直廬

移器用於外世宗病亟勿省也拱疑應嘉受階指大憾

之穆宗即位進少保兼太子太保階雖為首輔而拱自

以帝舊臣數與之抗朴復助之階漸不能堪而是時以勤與張居正皆入閣居正亦侍裕邸講階草遺詔獨與居正計拱心彌不平會議登極賞軍及請上裁去留大臣事階悉不從拱議嫌益深應嘉掌吏科佐部院考察事將竣忽有所論救帝責其牴牾下閣臣議罰朴奮然曰應嘉無人臣禮當編氓階旁睨拱見拱方怒勉從之言路謂拱以私怨逐應嘉交章劾之給事中歐陽一敬劾拱尤力階於拱辯疏擬旨慰留而不甚謹言者拱益

怒相與忿詆閤中御史齊康為拱劾階康坐黜於是言

路論拱者無虛日南京科道至拾遺及之拱不自安乞
歸遂以少傅兼太子太傅尚書大學士養病去隆慶元
年五月也拱以舊學蒙眷注性强直自遂頗快恩怨卒

不安其位去既而階亦乞歸三年冬帝召拱以大學士
兼掌吏部事拱乃盡反階所為凡先朝得罪諸臣以遺
詔錄用贈卹者一切報罷且上疏極論之曰明倫大典
頒示已久今議事之臣假託詔旨凡議禮得罪者悉從

哀顯將使獻皇在廟之靈何以為享先帝在天之靈何
以為心而陛下歲時入廟亦何以對越二聖臣以為未
可帝深然之法司坐方士王金等子弑父律拱復上疏
曰人君隕於非命不得正終其名至不美先帝臨御四
十五載得歲六十有餘末年抱病經歲上賓壽考令終
曾無暴遽今謂先帝為王金所害誣以不得正終天下
後世視先帝為何如主乞下法司改議帝復然拱言命
減戍拱之再出專與階修郤所論皆欲以中階重其罪

賴帝仁柔弗之竟也階子弟頗橫鄉里拱以前知府蔡國熙為監司簿錄其諸子皆編戍所以扼階者無不至逮拱去位乃得解拱練習政體負經濟才所建白皆可行其在吏部欲遍識人才授諸司以籍使署賢否誌爵里姓氏月要而歲會之倉卒舉用皆得其人又以時方憂邊事請增置兵部侍郎以儲總督之選由侍郎而總督由總督而本兵中外更番邊材自裕又以兵者專門之學非素習不可應卒儲養本兵當自兵部司屬始宜

慎選司屬多得智謀才力曉暢軍旅者久而任之勿遷他曹他日邊方兵備督撫之選皆於是取之更各取邊地之人以備司屬如銓司分省故事則題覆情形可無扞格并重其賞罰以鼓勵之凡邊地有司其責頗重不宜付雜流及遷謫者皆報可著為令拱又奏請科貢與進士竝用勿循資格其在部考察多所參伍不盡憑文書為黜陟亦不拘人數多寡黜者必告以故使衆咸服古田徭賊亂用殷正茂總督兩廣曰是雖貪可以集事

貴州撫臣奏土司安國亨將叛命阮文中代為巡撫臨
行語之曰國亨必不叛若往無激變也既而如其言以
廣東有司多貪黷特請旌廉能知府侯必登以厲其餘
又言馬政鹽政之官名為卿為使而實以閒局視之失
人廢事漸不可訓惟教官驛遞諸司職卑祿薄遠道為
難宜銓注近地以恤其私詔皆從之拱所經畫皆此類
也諳達孫巴噶奈濟來降總督王崇古受之請於朝乞
授以官朝議多以為不可拱與居正力主之遂排衆議

請於上而封貢以成事具崇古傳進拱少師兼太子太

師尚書大學士改建極殿拱以邊境稍寧恐將士惰玩

復請敕邊臣及時閒暇嚴為整頓仍時遣大臣閱視帝

皆從之遼東奏捷進柱國中極殿大學士尋考察科道

拱請與都察院同事時大學士趙貞吉掌都察院持議

稍異同給事中韓楫劾貞吉有所私庇貞吉疑拱嫉之

遂抗章劾拱拱亦疏辨帝不直貞吉令致仕去拱既遂

貞吉專橫益著尚寶卿劉奮庸上疏陰斥之給事中曹

大埜疏劾其不忠十事皆謫外任拱初持清操後其門
生親串頗以賄聞致物議帝終眷拱不衰也始拱為祭
酒居正為司業相友善拱亟稱居正才及是李春芳陳
以勤皆去拱為首輔居正肩隨之拱性直而傲同官殷
士儋輩不能堪居正獨退然下之拱不之察也馮保者
中人性黠次當掌司禮監拱薦陳洪及孟冲帝從之保
以是怨拱而居正與保深相結六年春帝得疾大漸召
拱與居正高儀受顧命而崩初帝意專屬閣臣而中官

矯遺詔命與馮保共事神宗即位拱以主上幼冲懲中
官專政條奏請詘司禮權還之內閣又命給事中雒遵
程文合疏攻保而已從中擬旨逐之拱使人報居正居
正陽諾之而私以語保保訴於太后謂拱擅權不可容
太后頷之明日召羣臣入宣兩宮及帝詔拱意必逐保
也急趨入比宣詔則數拱罪而逐之拱伏地不能起居
正掖之出僦驪車出宣武門居正乃與儀請留拱弗許
請得乘傳許之拱既去保憾未釋復構王大臣獄欲連

及拱已而得寢居家數年卒居正請復其官與祭葬如
例中旨給半葬祭文仍寓貶詞云久之廷議論拱功贈
太師諡文襄廕嗣子務觀為尚寶丞郭朴字質夫安陽
人嘉靖十四年進士選庶吉士累官禮部右侍郎入直
西苑歷吏部左右侍郎兼太子賓客南京禮部缺尚書
帝憐朴久次特加太子少保擢任之朴辭曰幸與撰述
不欲遠離闕下帝大喜命即以太子少保禮部尚書詹
事府侍直如故頃之吏部尚書歐陽必進罷即以朴代

之越二年以父喪去及嚴訥由吏部入閣帝謀代者時
董份以工部尚書行吏部左侍郎事方受帝眷而為人
貪狡無行徐階慮其代訥急言於帝起朴故官朴固請
終制不許尋以考績加太子太保四十五年兼武英殿
大學士入預機務與高拱並命階早貴權重春芳訥事
之謹至不敢講鈞禮而朴與拱鄉里相得事階稍倨拱
尤負才自恣及世宗崩階草遺詔盡反時政之不便者
拱與朴不得與聞大憲兩人遂與階有隙言路劾拱者

多及朴拱謝病歸朴不自安亦求去帝固留之時朴已
加至少傳太子太傅矣御史龐尚鵬凌儒等攻不止遂
三疏乞歸家居二十餘年卒贈太傅諡文簡朴為人長
者兩典銓衡以廉著輔政二年無過特以拱故不容於
朝時頗有惜之者

張居正字叔大江陵人少穎敏絕倫十五為諸生巡撫
顧璘奇其文曰國器也未幾居正舉於鄉璘解犀帶以
贈且曰君異日當腰玉犀不足潤子嘉靖二十六年居

正成進士改庶吉士日討求國家典故徐階輩皆器重之授編修請急歸亡何還職居正為人頗面秀眉目鬚長至腹勇敢任事豪傑自許然沉深有城府莫能測也嚴嵩為首輔忌階善階者皆避匿居正自如嵩亦器居正遷右中允領國子司業事與祭酒高拱善相期以相業尋還理坊事遷侍裕邸講讀王甚賢之邸中中官亦無不善居正者而李芳數從問書義頗及天下事尋遷右諭德兼侍讀進侍講學士領院事階代嵩首輔傾心

委居正世宗崩階草遺詔引與共謀尋遷禮部右侍郎

兼翰林院學士月餘與裕邸故講官陳以勤俱入閣而

居正為吏部左侍郎兼東閣大學士尋充世宗實錄總

裁進禮部尚書兼武英殿大學士加少保兼太子太保

去學士五品僅歲餘時徐階以宿老居首輔與李春芳

皆折節禮士居正最後入獨引相體倨見九卿無所延

納間出一語輒中肯人以是嚴憚之重於他相高拱以

很躁被論去徐階亦去春芳為首輔亡何趙貞吉入易

視居正居正與故所善掌司禮者李芳謀召用拱俾領吏部以扼貞吉而奪春芳政拱至益與居正善春芳尋引去以勤亦自引而貞吉殷士儋皆為所構罷獨居正與拱在兩人益相密拱主封諱達居正亦贊之授王崇古等以方略加柱國太子太傅六年滿加少傅吏部尚書建極殿大學士以遼東戰功加太子太師和市成加少師餘如故初徐階既去令三子事居正謹而拱銜階甚嗾言路追論不已階諸子多坐罪居正從容為拱言

拱稍心動而拱客構居正納階子三萬金拱以請居正
居正色變指天誓辭甚苦拱謝不審兩人交遂離拱又
與居正所善中人馮保却穆宗不豫居正與保密處分
後事引保為內助而拱欲去保神宗即位保以兩宮詔
旨逐拱事具拱傳居正遂代拱為首輔帝御平臺召居
正獎諭之賜金幣及繡蟒斗牛服自是賜賚無虛日帝
虛已委居正居正亦慨然以天下為己任中外想望丰
采居正勸帝遵守祖宗舊制不必紛更至講學親賢愛

民節用皆急務帝稱善大計延臣斥諸不職及附麗拱者復具詔召羣臣廷飭之百僚皆惕息帝當尊崇兩宮故事皇后與天子生母並稱皇太后而徽號有別保欲媚帝生母李貴妃風居正以並尊居正不敢違議尊皇后曰仁聖皇太后皇貴妃曰慈聖皇太后兩宮遂無別慈聖徙乾清宮撫視帝內任保而大柄悉以委居正居正為政以尊主權課吏職信賞罰一號令為主雖萬里外朝下而夕奉行黔國公沐朝弼數犯法當逮朝議難

之居正擢用其子馳使縛之不敢動既至請貸其死錮之南京漕河通居正以歲賦逾春發水橫溢非決則涸乃采漕臣議督艘卒以孟冬月兌運及歲初畢發少罹水患行之久太倉粟充盈可支十年互市饒馬乃減太僕種馬而令民以價納太僕金亦積四百餘萬又為考成法以責吏治初部院覆奏行撫按勘者嘗稽不報居正令以大小緩急為限誤者抵罪自是一切不敢飾非政體為肅南京小奄醉辱給事中言者請究治居正謫

其尤激者趙參魯於外以悅保而徐說保裁抑其黨母
與六部事其奉使者時令緹騎陰訶之其黨以是怨居
正而心不附保居正以御史在外往往凌撫臣痛欲折
之一事小不合詬責隨下又敕其長加考察給事中余
懋學請行寬大之政居正以為風已削其職御史傅應
楨繼言之尤切下詔獄杖戍給事中徐貞明等羣擁入
獄視具索餽亦逮謫外御史劉臺按遼東誤奏捷居正
方引故事繩督之臺抗章論居正專恣不法居正怒甚

帝為下臺詔獄命杖百遠戍居正陽具疏救之僅奪其職已卒戍臺由是諸給事御史益畏居正而心不平當是時太后以帝冲年尊禮居正甚至同列呂調陽莫敢異同及吏部左侍郎張四維入恂恂若屬吏不敢以僚自處居正喜建豎能以智數馭下人多樂為之盡諳達款塞久不為害獨小王子部衆十餘萬東北直遼左以不獲通互市數入寇居正用李成梁鎮遼戚繼光鎮薊門成梁力戰却敵功多至封伯而繼光守備甚飭居正

皆石之邊境晏然兩廣督撫殷正茂凌雲翼等亦數破賊有功浙江兵民再作亂用張佳允往撫即定故世稱居正知人然持法嚴覈驛遞省冗官清庠序多所澄汰公卿羣吏不得乘傳與商旅無別郎署以缺少需次者輒不得補大邑士子額隘艱於進取亦多怨之者時承平久羣盜蝟起至入城市劫府庫有司恒諱之居正嚴其禁匿弗舉者雖循吏必黜得盜即斬決有司莫敢飾情盜邊海錢米盈數例皆斬然往往長繫或瘐死居正

獨亟斬之而追捕其家屬盜賊為衰止而奉行不便者
相率為怨言居正不恤也慈聖太后將還慈寧宮諭居
正謂我不能視皇帝朝夕恐不若前者之向學勤政有
累先帝付託先生有師保之責與諸臣異其為我朝夕
納誨以輔台德用終先帝憑几之誼因賜坐蟒白金綵
幣未幾丁父憂帝遣司禮中官慰問視殯藥止哭絡繹
道路三宮賻贈甚厚戶部侍郎李幼孜欲媚居正倡奪
情議居正惑之馮保亦固留居正諸翰林王錫爵張位

趙志皋吳中行趙用賢習孔教沈懋學輩皆以為不可

弗聽吏部尚書張瀚以持慰留旨被逐去御史曾士楚

給事中陳三謨等遂交章請留中行用賢及員外郎艾

穆主事沈思孝進士鄒元標相繼爭之皆坐廷杖謫斥

有差時彗星從東南方起長亘天人情洶洶指目居正

至懸謗書通衢帝詔諭羣臣再及者誅無赦謗乃已於

是使居正子編修嗣修與司禮太監魏朝馳傳往代司

喪禮部主事曹誥治祭工部主事徐應聘治喪居正請

無造朝以青衣素服角帶入閭治政侍經筵講讀又請
辭歲俸帝許之及帝舉大婚禮居正吉服從事給事中
李涑言其非禮居正怒出為僉事時帝顧居正益重常
賜居正札稱元輔張少師先生待以師禮居正乞歸葬
父帝使尚寶少卿鄭欽錦衣指揮史繼書護歸期三月
葬畢即上道仍命撫按諸臣先期馳賜璽書敦諭範帝
賚忠良銀印以賜之如楊士奇張孚敬例得密封言事
戒次輔呂調陽等有大事毋得專決馳驛之江陵聽張

先生處分居正請廣內閣員詔即令居正推居正因推
禮部尚書馬自强吏部右侍郎申時行入閣自强素迂
居正不自意得之頗德居正而時行與四維皆自昵於
居正居正乃安意去帝及兩宮賜賚慰諭有加禮遣司
禮太監張宏供張餞郊外百僚班送所過地有司飭廚
傳治道路遼東奏大捷帝復歸功居正使使馳諭俾定
爵賞居正為條列以聞調陽益內慚堅卧累疏乞休不
出居正言母老不能冒炎暑請俟清涼上道於是內閣

兩都部院寺卿給事御史俱上章請趣居正亟還朝帝
遣錦衣指揮翟汝敬馳傳往迎計日以俟而令中官護
太夫人以秋日由水道行居正所過守臣率長跪撫按
大吏越界迎送身為前驅道經襄陽襄王出候要居正
宴故事雖公侯謁王執臣禮居正具賓主而出過南陽
唐王亦如之抵郊外詔遣司禮太監何進宴勞兩宮亦
各遣大璫李琦李用宣諭賜八寶金釘川扇御膳餅果
醪醴百僚復班迎入朝帝慰勞懇篤予假十日而後入

閣仍賜白金彩幣寶鈔羊酒因引見兩宮及秋魏朝奉
居正母行儀從煊赫觀者如堵比至帝與兩宮復賜賚
加等慰諭居正母子幾用家人禮時帝漸備六宮太倉
銀錢多所宣進居正乃因戶部進御覽數目陳之謂每
歲入額不敵所出請帝置坐隅時省覽量入為出罷節
浮費疏上留中帝復令工部鑄錢給用居正以利不勝
費止之言官請停蘇松織造不聽居正為面請得損大
半復請停修武英殿工及裁外戚遷官恩數帝多曲從

之帝御文華殿居正侍講讀畢以給事中所上災傷疏聞因請振復言上愛民如子而在外諸司營私背公剝民罔上宜痛鉗以法而皇上加意樽節於宮中一切用度服御賞賚布施裁省禁止帝首肯之有所蠲貸居正以江南貴豪怙勢及諸奸猾吏民善逋賦選大吏精悍者嚴行督責賦以時輸國歲日益充而豪猾率怨居正居正服將除帝召吏部問期日敕賜白玉帶大紅坐蟒盤蟒御平臺召對慰諭久之使中官張宏引見慈慶慈

寧兩宮皆有恩賚而慈聖皇太后加賜御膳九品使宏
侍宴帝初即位馮保朝夕視起居擁護提抱有力小扞
格即以聞慈聖慈聖訓帝嚴每切責之且曰使張先生
聞奈何於是帝甚憚居正及帝漸長心厭之乾清小璫
孫海客用等導上遊戲皆愛幸慈聖使保捕海用杖而
逐之居正復條其黨罪惡請斥逐而令司禮及諸內侍
自陳上裁去留因勸帝戒遊宴以重起居專精神以廣
聖嗣節賞賚以省浮費却珍玩以端好尚親萬幾以明

庶政勤講學以資治理帝迫於太后不得已皆報可而
心頗嫌保居正矣帝初政居正嘗纂古治亂事百餘條
繪圖以俗語解之使帝易曉至是復屬儒臣紀太祖列
聖寶訓實錄分類成書凡四十曰創業艱難曰勵精圖
治曰勤學曰敬天曰法祖曰保民曰謹祭祀曰崇孝敬
曰端好尚曰慎起居曰戒遊佚曰正宮闈曰教儲貳曰
睦宗藩曰親賢臣曰去奸邪曰納諫曰理財曰守法曰
儆戒曰務實曰正紀綱曰審官曰久任曰重守令曰馭

近習曰待外戚曰重農桑曰興教化曰明賞罰曰信詔
令曰謹名分曰裁貢獻曰慎賞賚曰敦節儉曰慎刑獄
曰褒功德曰屏異端曰飭武備曰御戎狄其辭多警切
請以經筵之暇進講又請立起居注紀帝言動與朝內
外事日用翰林官四員入直應制詩文及備顧問帝皆
優詔報許居正自奪情後益偏恣其所黜陟多由愛憎
左右用事之人多通賄賂馮保客徐爵擢用至錦衣衛
指揮同知署南鎮撫居正三子皆登上第蒼頭游七入

貲為官勛戚文武之臣多與往還通姻好七具衣冠報
謁列於士大夫世以此益惡之亡何居正病帝頻頒敕
諭問疾大出金帛為醫藥資四閱月不愈百官竝齋醮
為祈禱南都秦晉楚豫諸大吏亡不建醮帝令四維等
理閣中細務大事即家令居正平章居正始自力後憊
甚不能偏閱然尚不使四維等參之及病革乞歸上復
優詔慰留稱太師張太岳先生居正度不起薦前禮部
尚書潘晟及尚書梁夢龍侍郎余有丁許國陳經邦已

復薦尚書徐學謨曾省吾張學顏侍郎王篆等可大用
帝為黏御屏晟馮保所受書者也強居正薦之時居正
已昏甚不能自主矣及卒帝為輟朝諭祭九壇視國公
兼師傅者居正先以六載滿加特進中極殿大學士以
九載滿加賜坐蟒衣進左柱國蔭一子尚寶丞以大婚
加歲祿百石錄子錦衣千戶為指揮僉事以十二載滿
加太傅以遼東大捷進太師益歲祿二百石子由指揮
僉事進同知至是贈上柱國諡文忠命四品京卿錦衣

堂上官司禮太監護喪歸葬於是四維始為政而與居正所薦引王篆曾省吾等交惡初帝所幸中官張誠見惡馮保斥於外帝使密詞保及居正至是誠復入悉以兩人交結恣橫狀聞且謂其實藏踰天府帝心動左右亦浸言保過惡而四維門人御史李植極論徐爵與保挾詐通奸諸罪帝執保禁中逮爵詔獄謫保奉御居南京盡籍其家金銀珠寶鉅萬計帝疑居正多蓄益心豔之言官劾篆省吾并劾居正篆省吾俱得罪新進者益

務攻居正詔奪上柱國太師再奪諡居正諸所引用者
斥削殆盡召還中行用賢等遷官有差劉臺贈官還其
產御史羊可立復追論居正罪指居正搆遼庶人憲燂
獄庶人妃因上疏辯寃且曰庶人金寶萬計悉入居正
帝命司禮張誠及侍郎邱橐偕錦衣指揮給事中籍居
正家誠等將至荊州守令先期錄人口錮其門子女多
逃避空室中比門啟餓死者十餘輩誠等盡發其諸子
兄弟藏得黃金萬兩白金十餘萬兩其長子禮部主事

敬修不勝刑自誣服寄三十萬金於省吾篆及傳作舟

等尋自縊死事聞時行等與六卿大臣合疏請少緩之

刑部尚書潘季馴疏尤激楚詔留空宅一所田十頃贍

其母而御史丁此呂復追論科場事謂高啟愚以舜禹

命題為居正策禪受尚書楊巍等與相駁此呂出外啟

愚削籍後言者復攻居正不已詔盡削居正官秩奪前

所賜璽書四代誥命以罪狀示天下謂當剖棺戮屍而

姑免之其弟都指揮居易子編修嗣修俱發戍烟瘴地

終萬厯世無敢白居正者熹宗時廷臣稍稍追述之而鄒元標為都御史亦稱居正詔復故官予葬祭崇禎三年禮部侍郎羅喻義等訟居正寃帝令部議復二廕及誥命十三年敬修孫同敞請復武廕併復敬修官帝授同敞中書舍人而下部議敬修事尚書李日宣等言故輔居正受遺輔政事皇祖者十年肩勞任怨舉廢飭弛弼成萬厯初年之治其時中外乂安海內殷阜紀綱法度莫不修明功在社稷日久論定人益追思帝可其奏

復敬修官同敞負志節感帝恩益自奮十五年奉敕慰
問湖廣諸王因令調兵雲南未復命兩京相繼失走詣
福建唐王亦念居正功復其錦衣世廕授同敞指揮僉
事尋奉使湖南聞汀州破依何騰蛟於武崗永明王用
廷臣薦改授同敞侍讀學士為總兵官劉承蔭所惡言
翰林吏部督學必用甲科乃改同敞尚寶卿以大學士
瞿式耜薦擢兵部右侍郎兼翰林侍讀學士總督諸路
軍務同敞有文武材意氣慷慨每出師輒躍馬為諸將

先或敗奔同敞危生不去諸將復還戰或取勝軍中以是服同敞大將王永祚等久圍永州

大兵赴救胡一青率衆迎敵戰敗同敞馳至全州檄楊國棟兵策應乃解去

順治七年大兵破嚴關諸將盡棄桂林走城中虛無人獨式耜端坐府中適同敞自靈川至見式耜式耜曰我為留守當死此子無城守責盍去諸同敞正色曰昔人恥獨為君子公顧不許同敞共死乎式耜喜取酒與飲

明燭達旦侵晨被執諭之降不從令為僧亦不從乃幽之民舍雖異室聲息相聞兩人日賦詩倡和閱四十餘日整衣冠就刃顏色不變既死同敝屍植立首墜躍而前者三人皆辟易而居正第五子允修字建初廕尚寶丞崇禎十七年正月張獻忠掠荊州允修題詩於壁不食而死

贊曰徐階以恭勤結主知器量深沉雖任智數要為不失其正高拱才略自許負氣凌人及為馮保所逐柴車

即路傾軋相尋有自來已張居正通識時變勇於任事
神宗初政起衰振隳不可謂非幹濟才而威柄之操幾
於震主卒致禍發身後書曰臣罔以寵利居成功可弗
戒哉

明史卷二百十三

欽定四庫全書

明史卷二百十三考證

徐階傳嘉靖二年進士第三人

臣

章宗瀛按階初舉

應天試學士董玘異其文謁謁內閣輔臣楊廷和語其寮謂名位不在我輩下見識大錄謹附考

徐階傳請立皇太子不報

臣

章宗瀛按是時當繼莊

敬太子而立者為裕王是即穆宗而景王與同齒其母妃盧氏方幸中外未測意旨階故特請之詳識大

錄謹附考

徐階傳令御史鄒應龍劾嚴嵩

臣

章宗瀛按嚴嵩傳

置酒要階使家人羅拜舉觴屬曰此曹惟公乳哺之
未幾嘉靖入方士藍道行言有意去嵩御史鄒應龍
避雨內侍家知其事乃抗疏劾嵩傳言階令應龍劾
之與嵩傳互異謹識